

Latihan Karangan Laporan

Anda telah dilantik sebagai setiausaha kokurikulum sekolah sejak setahun yang lalu. Pada hujung tahun, anda dikehendaki menghantar laporan kepada guru penasihat.

Tulis laporan tersebut selengkapnya.

Panjangnya karangan anda hendaklah antara 350-500 patah perkataan.

Laporan Aktiviti Kokurikulum Sekolah Menengah Kebangsaan Tunku Sulong Tahun 2021

Aktiviti kokurikulum telah bermula sejak minggu pertama persekolahan 2021. Pada hari Selasa minggu tersebut, mesyuarat agung rumah-rumah sukan telah berlangsung. Setiap rumah sukan mempunyai 10 orang guru penasihat dan ahli jawatankuasa yang dilantik oleh ahli rumah sukan masing-masing. (a) _____

Semua murid wajib menyertai ketiga-tiga bahagian tersebut. Kehadiran dan aktiviti yang dilakukan oleh murid akan direkodkan dalam buku khas.

Aktiviti kokurikulum pada tahun ini dimulakan dengan acara sukan. Contohnya, pertandingan sukan, pertandingan bola sepak, dan sebagainya. (b) _____

Sekolah Menengah Kebangsaan Tunku Sulong telah menjadi tuan rumah bagi kedua-dua pertandingan yang berlangsung pada hujung bulan Januari. Sementara itu, pertandingan sukan yang lain diadakan mengikut jadual. Pada pertengahan bulan Februari, kejohanan olahraga sekolah pula mengambil alih. Pihak pentadbiran kokurikulum berjaya melibatkan semua murid dalam aktiviti sukan dan permainan.

Pada tahun ini atlet-atlet sekolah berjaya menunjukkan pencapaian yang amat memberangsangkan. Mikail bin Amin dan Nazirah binti Nasir telah dipilih sebagai atlet terbaik dalam kejohanan olahraga peringkat negeri. Dalam permainan boling padang pula, pasukan sekolah mencatat kejayaan dalam beberapa kategori pada peringkat negeri dan kebangsaan. (c) _____

Pada bulan Februari, pasukan unit beruniform memulakan latihan secara intensif. Semua perancangan unit beruniform selari dengan takwim sekolah. Tumpuan diberikan pada pertandingan kawad kerana pemenang pertandingan tersebut akan berpeluang mengadakan persembahan kawad pada kejohanan olahraga sekolah dan daerah. (d) _____

Murid yang menghayati falsafah di balik aktiviti unit uniform akan menjadi murid yang lebih berdisiplin.

Aktiviti perkhemahan menjadi agenda penting bagi setiap unit beruniform. (e) _____

Perkhemahan perdana kali ini diadakan di Tapak Perkhemahan Puncak Beris. Perkhemahan perdana merupakan kemuncak aktiviti yang mendapat sambutan di luar dugaan dalam kalangan murid.

Ahli-ahli kelab dan persatuan giat menyusun jadual dan melaksanakan perancangan. (f) _____

Antara aktiviti kelab dan persatuan termasuklah kuiz, forum, dan pertandingan perbahasan. Kebanyakan ahli bagi setiap bahagian kokurikulum ialah orang yang sama cuma tampuk kepemimpinan sahaja yang berbeza. Ada juga murid yang mengetuai unit beruniform tetapi menjadi ahli biasa bagi persatuan dan kelab. Dengan cara ini aktiviti kokurikulum akan berjaya mengasah bakat murid dan menyerlahkan ciri kepemimpinan yang ada pada setiap murid.

Konklusinya, aktiviti kokurikulum di sekolah ini berjalan dengan lancar. Sambutan daripada murid pada tahun ini amat menggalakkan. Budaya ikram seperti kerjasama, tolak ansur, dan hormat-menghormati diamalkan dengan sempurna di sekolah ini. Hal ini membuktikan bahawa aktiviti kokurikulum berjaya menyemaikan nilai murni dalam diri murid.

Laporan disediakan oleh,

19 OKTOBER 2021.

Umi Khalsom

.....
(UMI KHALSOM BINTI HARUN)

Setiausaha Kokurikulum Murid,

Sekolah Menengah Kebangsaan Tunku Sulong.